

PAVORO ITSIRINKAIGAKENERIRA KOROSAKUNIRIRA

Ikogakotagantaigakerira kametikyarika inaigake

1 ¹⁻²¿Aiñoegivi viroegi kametikyarika pinaigake? Narori aiñoa aka kametiky nonake, notentakari napigematsatene Timoteo nontsirinkai-gakempira maganiro viroegi timaigatsirira kara Korosaku kematsatasanoigiririra Kirishito. Narori nanti iritigankane Jesokirishito, intitari kogakagakena Tasorintsi. Noniaventaigakempi inkavintsaaaveigakempira irirori intimakagaigakempira kameti ganiri tatoita povankinaventumaigaa.

Pavoro iniaventaigakerira kematsaigatsirira timaigatsirira Korosaku

³Omirinka noniaigirira Tasorintsi, Iriri Atinkami Jesokirishito, nokantaigakeri noshinevageigaka, ⁴nokemakoigakempitari pikematsatasanoigirira Jesokirishito. Aikiro nokemakoigakempi pitasanoigarira maganiro papigematsaegine. ⁵Viroegi iroro pikemaigakerora Niagantsisanorira kamantakotakeririra Jesokirishito tyara ikanta yogavisaakotantira, ogatyo pikenaiigake pogiakoiganaka intentaiganakempira enoku inkavintsajaigakempira, nerotyo pikañotantaigakarira maika pikematsatasanoigakerira, aikiro pitasanoigakarira papigematsaegine. ⁶Okari Niagantsisanorira okenkitsatunkani apagiteakova-

getanakaro magatiro kipatsi, ikantatigantaiganakarira tovaini matsigenkaegi ikañoiganakempi viroegi iroro pikemai-gavakerora pikematsaigakero pikantatigantaiganakarira. Nerotyo pogotasano-tantaigakarira tyara ikantaka Tasorintsi ikavintsajaigakaira. ⁷Pine karanki notigankakeri notentavagetarira Epapera yogotagasanoigakitimpira Niagantsisanorira. Irirori intitari aikiro piriniventirorira ikamantakotirira Jesokirishito. ⁸Impogini ipokaira ikamantapaakena ikanti paio pitasano-tantavageiganaka viroegi, intitari gaveakagaigakempi Isure Tasorintsi nerotyo pikañotantaigakarorira maika.

⁹Iroro ikamantaigakenara omirinka noniaventaigakempi nokantaigakerira Tasorintsi impaigakempirora irogotane, aikiro irogikoneaigakempirora magatiro ikogagetakerira pogotasanoigakeroniri ¹⁰kameti pagaveaigakeniri pineginteva-geiganakempira pogishineaiigakerira. Antari pinkañoigakemparika maika ario pinkante povetsikaigake posantepage kametiripage, aikiro ariompatyo pogotasanoiganakerira Tasorintsi. ¹¹Noniaventaiganakempi aikiro ishintsitagaigakempira Tasorintsi kameti pantsipereakoigakempaniri magatiro pishinevageigakempira, ¹²pinkantaigakerira Tasorintsi pishinevageigaka, pogoigaketari yogavisaakoigakempi kameti pintentagakempariniri maganiro kematsatasa-

noigiririra inkavintsajaigakerira
impogini anta enoku garira otimumati
terira onkametite.

¹³Pairani inti shintaigavetakai
kamagarini, impogini yogavisaakoigakai
Tasorintsi irirokya shintaigakai Itomi
itasanotarira, ovashi ipegaka Atinkami.
¹⁴Irirotari kamaventaigakai kameti
irogavisaakoigakaeniri Tasorintsi
imagisantaerora akañovageigara.

**Jesokirishito paio
yavisavageteri maganiro**

¹⁵Yogari Tasorintsi tera inkoneatu-
mate, kantankicha antari ipokutira
Kirishito aka kipatsiku yogikoneatimoi-
gakai tyara ikanta, ikañotasanotakari-
tari irirori, intitari Itomi iketyosanorira
timankitsi tekyara tatakona timumage-
tatsine. ¹⁶Irirotari itentashitaka Tasorin-
tsi okyara yovetsikageterora magatiro
timagetatsirira enoku ontiri timagetatsi-
rira kipatsiku. Yovetsikaigakeri
koneagetatsirira intiegiri terira inkonea-
gete timaigatsirira igoveenkarietegite
intiegiri itinkamipage gaveavageigatsi-
rira, kantankicha irirotari Kirishito
vetsikaigakeri maganiro irashintaiga-
kemparira. ¹⁷Irirori ikantakani itimi
pairani tekyara tatakona timumageta-
tsine, irirotari kantakanirira ineginteva-
getiro magatiro. ¹⁸Irirori inti Itinkami
maganiro kematsaigatsirira, irirotari
ganiaigakeri. Inti iketyorira ivatankitsi
yanianaira. Ikañotantakarorira maika
onti kameti iravisavageigakeriniri
maganiro, aikiro iragaveagiteakeroniri
magatiro. ¹⁹Tsikyatatari ikogake
Tasorintsi inkantakanira inkañotaso-
takempari irirori. ²⁰Pairani Tasorintsi
tera irishineigavetempari maganiro
timaigatsirira kipatsiku intiegiri aikiro
timaigatsirira enoku. Ario ikañoigaka
iriroegi tera irishineigavetempari
Tasorintsi. Irorotari itigankantakaririra

Kirishito inkamaventaigakaera
koroshiku kameti antentaigakempariniri
Tasorintsi ashinevakagaigakempara.

²¹Pairani viroegi tera pishineventai-
gempari Tasorintsi, onti pikisaigakeri
povetsikageigaketari posantepage terira
onkametite. ²²Irorotari ipokashituti
Kirishito aka kipatsiku imechotakera,
impo ikamaventaigakitimpi kameti
pintentaigakempariniri Tasorintsi
pishinevakagaigakempara. Neroty
maika ineigakempi saankavageigakevi
kañomatata tenirikatyo pinkañovagetu-
maigempa, tatampa kankagantai-
gaempine. ²³Kantankicha maika
pinkematsatanovageiganakerora
Niagantsi Kametiri gara papakuimai-
giro, aikiro gara pikemisantaigiri
gagaigirorira ganiri pimagisantaigiro
yogavisaakoigakempira Tasorintsi.
Irorotari oka Niagantsi Kametiri
pikemaigakerira okyara. Maika
okenkitsatakotanunkani apagiteakova-
getanaka magatiro. Irorotari nopirini-
ventavagetake naro nokenkitsatakotake-
rora.

**Tasorintsi itigankakeri Pavoro
impiriniventaigakerira kematsaigatsirira**

²⁴Yogari Kirishito yatsipereaventaiga-
keri maganiro kematsaigakerineririra
ikamaventaigakerira. Maika noshineva-
getaka nokañotanakarira naro natsipe-
reaventaigakempira viroegi intiegiri
aikiro maganiro ikamaventaigakerira.
²⁵Irirotari tigankakena Tasorintsi
nompiriniventaigakerira maganiro
kematsaigatsirira nogotagaigakerira
magatiro Iriniane. Nokañotantakarorira
maika kameti pogotasanoigakeroniri
viroegi. ²⁶Pairani teranika ogoveten-
kani, tekyatanika irogikoneatimotantero
Tasorintsi, kantankicha maika mataka
yogikoneaigakeri maganiro kematsai-
giririra. ²⁷Ikogaketari pogoigakerora

oka: Yogari Kirishito itimasurentaigakeri maganiro kematsaigiririra, irirorika jorioegi intirika terira iriroegi jorioegi, irorotari itimasurentantaigakempirira viroegi aikiro. Impogini iramaigana-kempi enoku itimira pinkañotasanoga-kempirira irirori. ²⁸Iriroritari nokenkitsa-takoigake nokanomajaigakerira terira inkematsatasanoigeri, aikiro nogotagai-gakerira maganiro kematsaigiririra ariompaniri inkañoiganakempirira irirori kameti ineiaigakenkaniniri arisano opaitaka itentasanogakarira. ²⁹Nerotyo nopirini ventakero natsipereaventakerora, intitari shintsitagakena Kirishito omirinka yagaveakagakena.

2 ¹Maika nokogake pogoigakera nopomirintsiventavageigakempi viroegi intiegiri maganiro timaigatsirira Iraoriseaku intiegiri aikiro maganiro pashini terira ineimaigena. ²Nokañotaka maika kameti pishintsitashiiigakeroniri magatiro pokashiigakempinerira, aikiro ariompaniri pintavakagasanoiganakempari. Aikiro nokogake pogotasanoigakerora terira ogovetenkani pairani, tekyatanika irogikoneatimotantero Tasorintsi, kantankicha maika agoigake, yogikoneatimoigakairoritari, intitari nokantakotake Kirishito. Antari pogotasanoiganakerora ario pinkante pogotasanoiganake aikiro arisano intsatagakero Tasorintsi magatiro ikantaigakairira ovashi pishinevageigakempa. ³Irirori paio yogotasanoavageti magatiro terira ogovetenkani, aikiro yogotasanoavageti tyara ikanta Tasorintsi, nerotyo paniro irirori iragaveake irogikoneatimoigakaerora. ⁴Nokantaigakempi maika kameti ganiri tyani matavinaigimpi iragaveantaigakempirora irashiegi igenkitsaneegi. ⁵Teratyo ario nontentaigavetempi, kantankicha año nosuretakoigakempi. Noshinevagetakatyto nokemakoigakempira pitimaiga-

kera kameti, aikiro pikematsatasanoigakerira Kirishito.

Inkematsatasanotakenkanira Kirishito

⁶Maikari maika pikematsaigakeritari Atinkami Jesokirishito pinkantakanityo pinkusotasanoigakempari. ⁷Ariompatyo pinkematsatasanoiganakeriri pisuretasanogianakempirira, aikiro pinkantakanira pinkusoigakempari pinkañotagaigakerora yogotagaitakempirira okyara. Omirinka pishineventaigakempari Tasorintsi.

⁸Tsikyanira yamataviigimpikari niashiigarorira kogapage, tera iroronika iriniakoige yogotagaigakairira Kirishito, onti iniaikoigake yogotagantaigirira matsigenkaegi.

⁹Yogari Kirishito iponiaka enoku ipokuti aka kipatsiku imechotakera. Onti ikañotasanotakari Tasorintsi, iriroritari iatakotakera. ¹⁰Maika pitentasanogakaritari, tenige tatoita pinkogakoigaempa pintimaigakera kameti, iriroritari gaveakagaigakempi magatiro. Irirori paio yavisagetakeri maganiro itinkamiegi terira ineimagetenkani, yagaveavagetitari. ¹¹Iroto pikematsaigakerira Kirishito kañomataka ontinirikatatyto pikamapitsaigakero pikañovageigara. Tera iroro ogaratsaitunkanira pichonkirimeshinaegite kameti onkañotakempiniri maika, ontityo ikantatigakagaigakempira Kirishito pisureku. ¹²Antari yogiviaigakempira onti kañomataka ontinirikatatyto pitentagaigakeri Kirishito ikitatunkanira, imo pikonteaignanira onti kañomataka ontinirikatatyto pitentagaigakeri yanianaira. Pineaigakeritari Tasorintsi paio yagaveavageti, iriroritari ganiairirira Kirishito.

¹³Pairani povetsikageigi posantepage terira onkametite, kañomataka ontinirikatatyto pikamaigake, teranika pinkema-

tsatumaigeroi Tasorintsi, kantankicha maika pikematsaigakeri Kirishito, irorotari imagisantantaarorira Tasorintsi pikañovageigara tera isuretumataem-paro ovashi tenige pinkañoigaempa pairani onti kañomataka ontinirikatyo pitentagaigakari Kirishito yoganiaaganira. ¹⁴Pairani apomirintsiventaigavetakaro antsatagaigakerora magatiro ikantagetirira Tasorintsi ontsatagakenkanira ganiri ikisaviigairo akañovageigara, kantankicha tera agaveaige, irorotari atantaigakemparimera morekariku. Impogini ikamaventaigakai Kirishito koroshiku yogavisaakoigakaira ganiri ikisashiigajai Tasorintsi. ¹⁵Antari ikamaventaigakaira koroshiku yagaveagetakeri maganiro kamagarinipage yogipashiventaigakerira, ineakagaigakeritari maganiro arisano paio yagaveavageti yavisavageigakerira iriroegi maganiro.

**Asureigakemparora magatiro
ikogagetakerira Tasorintsi**

¹⁶Maika gara pikematsaigiri kantaigakempinerira onti povetsikaigake terira onkametite pogaigakarora ontirika poviikaigakarora ikantavitantaigirira iriroegi. Ario onkañotake aikiro gara pikematsaigiri inkantaviigakempirora ineagakempira tera pishineventaigem-paro iviesetaegite ontirika tera piviesetaige ikyaenkara koneataatsi kashiri. Aikiro ontirika ineagakempira povetsikaigakerora okantavitantaganirira ovetsikenkanira kutagiteriku apishigopireantaganirira. ¹⁷Magatiro okapage ontitari okantakotakeri Kirishito iripokakera irogavisaakoigakaera, kantankicha maikari maika mataka pokake, nerotyo tenige onkogakotaenkani ampiriniventaigaerora. ¹⁸Gara pikemisantaigiri yogaegi kantaigankitsirira garika pitigeroaventaigari isaanka-

riite Tasorintsi pinkañotagaigakempari irironirika pitigeroaventaiga Tasorintsi, irirori garatyo yogavisaakoigimpi. Iriroegi yaventakovageigaka kantankicha onti ipegamampegaigaka terira iraventakotumaigempa. Aikiro ikantagake ineakagaigakeri Tasorintsi posantepage okañotimoigakari igisanireku, aikiro isurevageigakaro pashinipage isuregeigakarira terira intimasurentaigeroi Isure Tasorintsi ovashi iroro okenantaka yaventakovageiganakara ineagakara yavisaigakerira maganiro terira inkañoigempari iriroegi. ¹⁹Tenige inkematsasanoigaeri Kirishito Itinkami maganiro kematsaigatsirira. Kantankicha aroegi kematsasanoigiririra ishintsitagaigakai kameti ankusotasanoigakempariniri antentavakagaigakempara ariompaniri agotasanoiganakeriri Tasorintsi ankañotasanoiganakemparira.

²⁰Antari pitentagaigakarira Kirishito ikamakera, onti kañomataka ontinirika pikamapitsaigakero yogotagantaigirira matsigenka. Maikari maika, ¿tyara okantaka pikematsaiganakerira terira inkematsaige? ²¹Iriroegi ikantavitantagiritari irogenkanira posantepage ivatsapage ikantaigake: “Gara pogumataro yoga, arionetyo inkañotake, gara pitsagatumatiri.” ²²Kantankicha maganiro yoga ikantaviigakeririra inti kantaviigakeri matsigenka, teranika iriro kantaviigerine Tasorintsi. Ontitari yovetsikashitunkani irogakenkanira, impo yogumatunkanira paa mameri. ²³Yogaegiri kañoiogiririra maika ineagiri ariori yogoiigake, aikiro ineagiri irorori yovetsikaigake ikogagetirira Tasorintsi, yatsipereavageigaketari itasegane itivageigara, kantankicha onti yamataviigaka. ¿Matsi tyara inkantaigakero itivageigara? ¿Matsi agaveake ontimakagaigakerira kameti ganigera

yovetsikaigai terira onkametite? Onti yaventakovageigaro kogapage.

3 ¹Viroegi pikematsaigakeritari Kirishito kañomataka ontinirikatyo pitentagaigakari yanianaira iataira enoku ipirinitaira inampinaku Tasorintsi irakosanoriraku. Iroroventi maika sureigemparonityo magatiro ikogageta-kerira irirori. ²Ariompatyo pinkañoiga-nakempari maika pisuretasanoigana-kemparora ganige pisureigaaro magatiro isureigarira terira inkematsaige, ³kañoigamatakavitari ontinirikatyo pikamapitsaigakero kipatsipagekutirira pitentagaigakaritari Kirishito ikamakera impo yoganiaigaimpi Tasorintsi kameti pinkantakaniniri pintentanoigakempari irirori intiri Kirishito pineakoigakemparora magatiro ishinetagaiakempirira. ⁴Impogini impigaatera Kirishito ganiaigakempirira pintentaigakemparira pinkañosatanogakemparira irirori ikoveenkavagetira.

**Irapakuasanogeiganakerora
yovetsikagisevageigavetarira terira
onkametite**

⁵Nonkantantaigakempirira gara pimatumaigairo aikiro povetsikagisevageigavetarira. Gara piatashitantavageigi, gara pogogeigi, gara pisuregisevageiga posante. Gara pikogaigi pashintaviova-geigakempara garika onti pinkañoigakempari shineventavageigaririra itasorintsiegite pashini. ⁶Maganirotari vetsikagisevageigatsirira kañopagerira oka inkisashiigakempari Tasorintsi impogini. ⁷Ario pikañoigavetakari viroegi pairani povetsikagisevageigave-taka posantepage terira onkametite, ⁸kantankicha maika pakuasanoigana-kero magatiro terira onkametite. Pakuasanoiganakero pitsimaenkaegi, gara pikisantaigai, gara pikisumanatan-taigai, gara pininatantaigai, gara

povosanteaigairo piniane, ⁹aikiro gara pamatavivakagaigaa, matakataripapakuaiganairo povetsikagisevageigavetakarira pairani terira onkametite. ¹⁰Viroegi pogoigaketari onti ikantatigakagaigakempi Tasorintsi kematsatagaigakempirira. Maika ariompa inkañotanakerori maika kameti pinkañosatanoganakempariniri irirori ovashi pogotasanoigakeri. ¹¹Antari akematsaigakerira Kirishito ineigaikai Tasorintsi ario akañovakagaigaka maganiro aroegi. Ario ikañoiga guriegoegi intiegiri jorioegi ario ikañovakagaigaka. Ario ikañoiga aikiro pashinirira inaiwake matsigenkaegi intiegiri pashini gantaigatsirira, intiegiri aikiro terira ogaratsaitenkani ichonkirimeshinaegite intiegiri yogaratsaitunkanirira. Ario ikañoiga aikiro yonampitunkanirira intiegiri terira ironampitenkani. Ikematsatumaigakerira Kirishito itimasurentaigakeri ineantaiganakaririra Tasorintsi ario ikañovakagaigaka maganiro.

¹²Itasanoigakempitari Tasorintsi ikogakagantaigakempirira irashintasanoigakempira. Nonkantantaigakempirira pintsarogakagavakagaigakempara kametikya pinkemavakagaigakempa. Gara pavisanatavakagaiga, pinkemisan-takovageigakempara iragashiitakempirika. ¹³Maika viroegi tavakagaigempa pantsipereakovageigakempara. Gara pikisashivageigari papigematsaegine tyarikara ikantaigimpi, ontityo pogavisaakoigakeri. Yogari Atinkami yogavisaakoigakai ganiri ikisaviigairo Tasorintsi magatiro avetsikaigakerira terira onkametite. Ario pinkañoigakeri irirori pogavisaakoigakerira papigematsaegine gara pikenkiagaigairi tyarikara ikantaigimpi. ¹⁴Pinkantakani pintavakagasanovageigakempa, pairotari avisakero magatiro. Antari antavakagai-

gakemparika antentasurentavakagaigakempatyo.

¹⁵Maika irogishineasanoigakempira Kirishito ganiri tatoita povankinaventumaigaa, irorotari ikogake Tasorintsi okyara ikogakagaigakempira pintentaigakemparira maganiro kematsaigiririra. Aikiro pishineventaigakemparira irirori, pineaigaketari paio ikavintsajai-gakempi. ¹⁶Pisuretakotasanoigakemparora magatiro ikantagetirira Kirishito. Pinkantaigakerira Tasorintsi impaigakempira irogotane pogotagavakagaigakempara pishintsitagavakagaigakempara kameti pishintsitashiigakeroniri tatarika oita pokashiigakempine. Pimatikaventaigakerira Tasorintsi pishineventasanoigakemparira, aikiro pimatikakoigakerira Jesokirishito. Pimatikakoigakerora magatiro isuretagaigakempirira Isure Tasorintsi. ¹⁷Maika pikematsaigakerira Atinkami Jeso pishineventaigakemparira Tasorintsi pinkantaigakerira paio ikametiti. Antari tatarika oita pantaigake ontirika tatarika piniaigake pisureigakemparora irororika ikogake Atinkami kameti irishineventakenkaniniri irirori.

Tyara inkantaigakempa kematsaigatsirira inegintevageigakerira itovaireegi

¹⁸Viroegi tsinaneegi, kematsaigeri pijime gara pipugatsanaigari, irorotari ikogi Atinkami. ¹⁹Viroegi surariegi, tasanogemparo pitsinanetsite gara pikisaigiro. ²⁰Viroegi ananekiegi, omirinkara pinkematsaigakeri piri ontiri piniro, irorotari ishineventasanovageta Atinkami. ²¹Viroegi tomintaigacharira, gara potsimananaigiri pitomiegi ontiri pishintoegi ganiri ikenkisureaiga ovashi ganige ikogaigai inkematsaigaempira. ²²Viroegi nampiriantsiegi, kematsatasa-noigeri nampiigimpirira pintsatagaigakerora magatiro inkantaigakempirira,

kantankicha gara intagati pikematsaigiri pineaigakerira ikamaguigakempira pogishineiaigakeriniri, pinkantakanityo pinkematsatasanoigakeri, intitari pisureiganakempa Tasorintsi pogishineiaigakerira. ²³Magatirotari tatarikara pantaige onti pantavagetagantsiigake kañomataka irironirikatyo pantaigakene Atinkami, teranika paniro pantimoigeri peraigimpirira. ²⁴Pogoigaketari inkavintsajaigakempira Atinkami Kirishito impunatasanoigakempira anta enoku, intitari pantaigakene, ²⁵kantankicha yogari vetsikagetatsirira terira onkame-tite inkisashitakenkani iratsipereavage-takera, ineiaigakaitari Tasorintsi maganiro ario akañovakagaigaka, teranika paniro irishineventempa, impo pashinikya inkisake.

4 ¹Viroegi nampitantaigacharira, negintekya pogaigakeri ponampiriaegi, aiñotari shintaigimpirira viroegi aikiro anta enoku. ²Gara piperatumaiga piniaigerira Tasorintsi. Gara piniaigiri kogapage onti pisuretasanoigakemparo pinkantaigakeririra, aikiro pinkantakanira pishineventaigakempari. ³⁻⁴Aikiro nokogaigake piniaventaigakenara naroege. Yogari Tasorintsi ikogakagaigakena nonkenkitsatakoigakerira Kirishito nonkamantaigakerira maganiro terira ogovetenkani pairani, irorotari yashita-koviitakena. Maika niaventaigena intimaigakeniri kogaigankitsinerira inkemisantaigakenara kameti nogikoneatasanoigakenerira tyara ikanta Kirishito yogavisaakotantira. ⁵Viroegi aikiro kametikya pogaigakeri terira inkematsaige, pogoigaketari gara samani okañota maika. ⁶Gara piniaivageigi kogapage vero vero vero, onti kametikya piniaigake kameti inkemisan-tavintsajaigakempiniri, aikiro ompote pogoigakeniri tyarika pinkantaigakeri paniropage.

Ikamantagaiganairira

⁷Maika nontigankakeri apigematsaegine Tikiko iriatakera viroegiku ovashi inkamantaigakitempi tyara nokanta aka notimira. Irirori inti pairorira imutakotanti, aikiro iriro notentashita nantava-geiginirira Atinkami. ⁸Onti nontigankavitakeri pinkemakoigaenara tyara nokantaigaka nonaigakera aka ontiri aikiro irogishineaigakempira. ⁹Inti intentanake apigematsaegine Oneshimo. Irirori intitari pitovaire. Ario ikañotaka irirori inti kematsasananotsirira. Iriroegi kamantaigakempine magatiro.

¹⁰Yogari Arishitariko notentakarira nashitakoigakara ikogake pinkemakoi-gakerira aña isureigakempi. Ario ikañotaka Marokoshi irirenti Verenave isureigakempi irirori. Maika nonkantutaigaempityo aikiro katinkarika iriatake ineaigakitempira kametikyara pagaigavakeri. ¹¹Aikiro Jeso Goshito ikogake pinkemakoigakerira aña isureigakempi. Itimaigavetaka tovaini jorioegi kematsaigatsirira, kantankicha intagani iriroegi tentaigakena nantavageigakenerira Atinkami nokamantaigakerira maganiro tyara ikanta Tasorintsi yogavisaakotantira ipegara Igoveenkariegitte kematsaigakeririra. Iriroegi yogishineasanoigakena imutakotasanoigakenara.

¹²Yogari pitovaire Epapera, iromperane Kirishito, ikogake pinkemakoigakerira aña isureigakempi. Omirinka iniaventasanoigakempi pinkantakanira pinkematsasanoigakeri Kirishito,

aikiro pogotasanoigakerora Iriniane Tasorintsi pintsatagasanoiganakerora magatiro ikogagetirira. ¹³Noneakeritari ipimirintsiventasanoigakempira viroegi, intiegiri timaigatsirira Iraoriseaku intiegiri timaigatsirira Ieraporiseku. ¹⁴Yogari gavintantatsirira Irokashi itasanotaganirira ario ikañotaka irirori ikogake pinkemakoi-gakerira aña isureigakempi. Ario ikañotaka Irimashi irirori. ¹⁵Kamantageri apigematsaegine timaigatsirira Iraoriseaku aña nosureigakari. Pimatakerora Nimpa irorori intiegiri kematsaigatsirira patoitapiniigacharira ovankoku pinkamantaigakerira aña nosureigakari iriroegi aikiro.

¹⁶Antari pagataigakera piniavantaigakerora oka notsirinkaigakempirira maika pimpakagantaigakeri kematsaigatsirira timaigatsirira Iraoriseaku iriniavantaigakerora iriroegi, impo irirokya pakagantaigakempirone notsirinkaigakeneririra iriroegi virokyari niavantaigakerone. ¹⁷Atsi kantaigeri Arekipo atanatsira irantavagetagantsitanakeneri Atinkami intsatagasanotakerora magatiro ikantakeririra, tsikyanira iperatakari.

¹⁸Maikari maika tsikyata naro Pavoro nontsirinkaiganakempiro oka nonkantaigakempira añona omirinka nosuretaikoigakempi. Añokyanatari yashitakoitana, gara pimagisantaigana piniaventagakenara. Ario nokañotaka naro omirinka noniaventagakempi inkavintsaavageigakempira Tasorintsi. *Maika intagati, Pavoro*